

APPENDIX ALTERA.

Typographus Lectori.

Sequentes Benedictiones in Rituáli Romano non inveniuntur. Sed quum in plurimorum votis sit, ut etiam alias diversas Benedictiones in promptu habeant, hinc vulgatiores, quæ tamen authenticitatis nota gaudent, in unum colligere et Appendicis alterius nomine heic addere visum est.

Benedictio coronæ Domini.

Propria Ordinis Camaldulensium.

- V.** Adjutórium nostrum in nómine Dómini.
R. Qui fecit cœlum et terram.
V. Benedíces coronæ anni benignitátis tuæ.
R. Et campi tui replebúntur ubertáte.
V. Dómine, exaúdi oratióem meam.
R. Et clamor meus ad te véniat.
V. Dóminus vobíscum. **R.** Et cum spírítu tuo.

Orémus.

Dómine Jesu Christe, qui in similitúdinem hóminum factus, trigínta et tribus annis es conversátus in mundo, et multa passus pro hóminum salúte, in cruce demum mori voluísti; dignáre quæsumus, hanc (vel has) bene ✠ dícere et sancti ✠ ficáre coronam, quam (vel coronas, quas) beáto Michaéli Eremítæ Camaldulénsi ad vitam, passióem et mortem tuam recoléndam institúere jussísti (vel inspirásti), ut qui eam (vel eas) pie gestáverit (vel gestáverint) et devóte recitáverit (vel recitáverint) múltiplici gratiárum et indulgentiárum consecutióne coronas in cœlo ætérnas obtinére mereátur (vel mereántur). Per te Jesu Christe, Salvátor mundi, qui vivis et regnas cum Deo

Patre, in unitáte Spírítus sancti Deus, per ómnia sæcula sæculórum. **R.** Amen.

Deinde adspergantur aqua benedicta.

Benedictio rosarii S. Josephi.

Ex Breviario Ord. Carmelitarum.

- V.** Adjutórium nostrum in nómine Dómini.
R. Qui fecit cœlum et terram.

Orémus.

Omnípotens et miséricors Deus, qui propter nímiám caritátem, qua dilexísti nos, Fílium tuum unigénitum Dóminum nostrum Jesum Christum pro redemptiόne nostra, de cœlis in terram descéndere, et beatíssimæ Vírginis Mariæ útero, Angelo nuntiánte, carnem suscipere voluísti, ut nos de potestáte inimíci eríperes, obsecrámus cleméntiam tuam, ut hoc rosárium in honórem, et laudem ejúsdem Genitrícis Fílii tui, ac perdilécti ejus Sponsi Joseph, conféctum, et dicátum, bene ✠ dicas, eíque tantam sancti Spírítus virtútem infúndas ✠ ut quicúmque hoc secum portáverit, atque in domo sua reverénter tenúerit, ab omni hoste visibili, et invisibili, semper et ubíque in hoc sæculo liberétur, et in éxitu suo, a beatíssimis illis Sponsis, plenus bonis opéribus tibi præsentári mereátur. Per eúmdem Dóminum nostrum.

R. Amen.

Adspergatur aqua benedicta.

Benedictio annuli S. Josephi.

Ex Breviario Ord. Carmelitarum.

- V.** Adjutórium nostrum in nómine Dómini.
R. Qui fecit cœlum et terram.

Orémus.

Deus, cujus verbo sanctificántur ómnia, quæ percípimus, effúnde quæsumus, bene ✠ dictionem tuam super nos et super hunc ánnulum, ut per intercessiónem beátæ Mariæ semper Vírginis, ac ejus Sponsi Joseph, quæcúmque præsentis vitæ necéssitas póstulat, misericórditer cum gratiárum actióne assequámur. Per Christum Dóminum nostrum. **R.** Amen.

Adspargatur aqua benedicta.

Benedictio rosarum societatis Ss. Rosarii.

V. Adjutórium nostrum in nómine Dómini.
R. Qui fecit cœlum et terram.
V. Dóminus vobíscum. **R.** Et cum spíritu tuo.

Orémus.

Deus, creátor et conservátor géneris humáni, dator grátiae spirituális, et largítor æternæ salutis; benedictióne tua sancta béne ✠ dic has rosas, quas pro grátiis tibi exsolvéndis cum devotióne et veneratióne beátæ sempérque Vírginis Mariæ, ejúsque rosárii, hódie tibi præsentámus et pétimus benedíci, et infúndi in eis per virtútem sanctæ cru ✠ cis benedictiónem cœlestem; ut qui eas ad odóris suavitatem, et repelléndas infirmitates humano úsui tribuísti, talem signáculo sanctæ cru ✠ cis benedictiónem accípiant, ut quibuscúmque in infirmitátibus appósitæ fúerint, seu qui eas in dómibus suis portáverint, ab infirmitate sanéntur, discédant diaboli, contremíscant et fúgiant pávidi cum suis ministris de habitatióne illis, nec ámplius tibi serviéntes inquietáre præsumant. Per Christum Dóminum nostrum. **R.** Amen.

Deinde adspargantur aqua benedicta.

Benedictio candelarum soc. Ss. Rosarii.

V. Adjutórium nostrum in nómine Dómini.
R. Qui fecit cœlum et terram.
V. Dóminus vobíscum. **R.** Et cum spíritu tuo.

Orémus.

Dómine Jesu Christe, lux vera, qui illúminas omnem hóminem veniéntem in hunc mundum; effúnde per intercessiónem Vírginis Mariæ Matris tuæ, (et per quíndecim ejus rosárii mystéria), bene ✠ dictionem tuam super hos céreos et candélas, et sanctífica eas lúmine tuæ grátiae; et concéde propítius, ut sicut hæc luminária igne visibili accénsa noctúrnas depéllunt ténebras, ita corda nostra invisibili igne ac Spíritus ✠ sancti splendóre illustráta, ómnium vitiórum cæcitate cáreant; ut puro mentis óculo cernere semper possímus quæ tibi sunt plácita, et nostræ salutí utilia, quátenus post hujus sæculi caliginósa discrimina, ad lucem indeficiéntem pervenire mereámur. Qui vivis et regnas cum Deo Patre in unitáte Spíritus sancti Deus, per ómnia sæcula sæculórum.

R. Amen.

Deinde adspargantur aqua benedicta.

Benedictio aquæ infirmis præstandæ.

Ad consequendam sanitatem meritis et intercessione beatissimæ Mariæ Virg. et S. Torelli Confessoris.

V. Adjutórium nostrum in nómine Dómini.
R. Qui fecit cœlum et terram.

Oratio.

Deus, qui miseratióne tua cœlesti homínibus nóxia súbtrahis, et benígna concédis, quique mota per Angelum tuum aqua languórem in pro-

bática piscína eripiéndò valetúdinem contulisti, infúnde in aqua ista tuæ bene ✠ dictionis rorem, ut de ea suméntes méritis et précibus beatissimæ Mariæ Vírginis, ac sancti Torélli Confessoris sanitátem consequántur infirmi, paritérque fœcundátæ mulieres a malis ingruéntibus salvæ, partúsque suos ad sacrosáncti Baptísmiti grátiam felíciter perducant. Per Christum Dóminum nostrum.

R. Amen.

(Breve 16. Decembris 1628.)

**Benedictio aquæ
cum reliquiis S. Petri Martyris.**

V. Adjutórium nostrum in nómine Dómini.

R. Qui fecit cœlum et terram.

V. Dómine, exaúdi oratióem meam.

R. Et clamor meus ad te véniat.

V. Dóminus vobíscum.

R. Et cum spírítu tuo.

Orémus.

Deus, qui ad salútem humáni géneris máxima quæque sacraménta in aquárum substántia condidisti; adésto propítius invocatióibus nostris et eleménto huic aquæ, quod beáti Petri Mártyris tui virtúte consignámus, virtútem tuæ bene ✠ dictionis infúnde; ut per intervéntum ejúsdem Mártyris tui, sit fidélibus tuis in remédium salutáre, dáemones ab eis ejiens, morbos ac infirmitátes córporis et ánimæ repéllens: et præsta, ut quicumque eam sumpserint, vel ea adspérsi fúerint, ab omni adversitáte ánimæ et córporis liberéntur, et utriúsque hóminis recípiant sanitátem. Per Christum Dóminum nostrum.

R. Amen.

Orémus.

Imménsam cleméntiam tuam, omnípotens ætérne Deus, humíliter implorámus; ut hos fidéles tuos, ad reliquias beáti Petri Mártyris devóte accedéntes, et ejus suffrágia postulántes, tua ineffábili virtúte bene ✠ dicere dignéris, ut per intervéntum ejúsdem Mártyris tui, ab omni ægritúde mentis et córporis liberáti, tuáque hic et ubíque misericórdia custodíti, et grátia salváti, post hujus quoque viæ ac vitæ cursum, ad ætérna mereámur gáudia pervenire. Per Christum Dóminum nostrum. R. Amen.

**Benedictio palmarum vel aliorum ramorum
in Festo S. Petri Mart.**

V. Adjutórium nostrum in nómine Dómini.

R. Qui fecit cœlum et terram.

V. Dómine, exaúdi oratióem meam.

R. Et clamor meus ad te véniat.

V. Dóminus vobíscum.

R. Et cum spírítu tuo.

Orémus.

Dómine Jesu Christe, Fili Dei vivi, béne ✠ dic hos árborum ramos supplicatióibus nostris, et infúnde eis Dómine, per virtútem sanctæ cru- ✠ cis, per intercessióem beáti Petri Mártyris, benedictióem cœléstem, qui triumpháturus de hoste géneris humáni per manus puerórum palmas et árborum ramos in honórem tuum adhibére volúisti, talémque benedictióem signáculo sanctæ cru- ✠ cis accípiant, ut in quibuscúmque locis áliquid ex eis pósitum fúerit, discédant príncipes tenebrárum et contremíscant et fúgiant pávidi cum ómnibus mínistris suis de locis vel habitatióibus illis.

Non ibi nóceant fúlmina et tempestátes, non fructus terræ consúmat aut depédat ulla intempéries eleméti, nihílque inquietet aut moléstet serviéntes tibi omnipoténti Deo. Qui vivis et regnas in sácula sáculórum. **R.** Amen.

Deinde adspergantur aqua benedicta.

Absolutio generalis
Tertiariis Franciscanis elargienda.

Dicto **Confíteor. Misereátur. Indulgéntiam.**

Sacerdos dicit:

Dóminus noster Jesus Christus, per suam piíssimam misericórdiam, et per méritum suæ sacratíssimæ passiónis te (vos) absólvat, grátiam suam tibi (vobis) infúndat; ego auctoritáte ipsíus, qua fungor, nec non auctoritáte summi totíus Ecclésiæ Pontíficis mihi in hac parte commissa, absólvo te (vos) a vínculo excommunicatiónis majóris vel minóris, si quod incurristi (incurristis); ab omni transgressióne mandatórum Dei et ejúsdem Ecclésiæ, simul et ab ómnibus peccátis tuis (vestris), in quantum claves se exténdunt; restituóque te (vos) eídem innocétiæ quam in Baptísmate acquisieras (acquisierátis). In nómine Patris, ✠ et Fílii, et Spíritus sancti. Amen.

In sede Confessionali, Confessarius hanc brevioré formulam aut similem aliam adhibere potest.

Auctoritáte apostólica, mihi in hac parte commissa, absólvo te ab ómnibus peccátis tuis, in quantum possum, et restituo te sacraméntis Ecclésiæ, et concédo tibi Indulgéntiam plenáriam (vel Benedictiónem papálem). In nómine Patris, ✠ et Fílii, et Spíritus sancti. Amen.

Formula benedictionis papalis
Tertiariis Franciscanis quater in anno elargienda.

Confíteor. Misereátur. Indulgéntiam.

Dóminus noster Jesus Christus, Fílius Dei vivi, qui beáto Petro Apóstolo suo dedit potestátem ligándi atque solvéndi, per suam piíssimam misericórdiam recípiat confessiónem tuam, et remíttat tibi ómnia peccáta quomodocúmque commissa, restituens tibi stolam primam quam in Baptísmate recepisti; et ego facultáte mihi ab apostólica sede tribúta, Indulgéntiam plenáriam, remissionem ómnium peccatórum, et Benedictiónem papálem tibi concédo. In nómine Patris, ✠ et Fílii, et Spíritus sancti. Amen.

Per sacrosáncta humánæ reparatiónis mystéria, remíttat tibi omnipotens Deus omnes præséntis ac futúre vitæ pœnas, paradísi portas apériat, et ad gáudia sempiterna perdúcat. Amen.

Benedícat vos omnipotens Deus, Pater, ✠ et Fílius, et Spíritus sanctus. **R.** Amen.

Formula absolutionis generalis et benedictionis papalis
in articulo mortis Tertiariis Franciscanis elargienda.

Confíteor. Misereátur. Indulgéntiam.

Dóminus noster Jesus Christus, Fílius Dei vivi, qui beáto Petro Apóstolo suo dedit potestátem ligándi atque solvéndi, per suam piíssimam misericórdiam recípiat confessiónem tuam, et remíttat tibi ómnia peccáta quomodocúmque commissa, restituens tibi stolam primam quam in Ba-